








John Carter Brown
Library
Brown University














24:2

Indianische Reise

IOHANNIS

Softmanni Oesterrodens,

Darinn er dem Leser zu gemüch
führet seinen fernen mühseligen Weg / den er in
weiteren und frembden Landen gethan / im Jar 1591. angefangen
nach verlauffenen fünff Jahren glücklich geendiget / und
mit gesundem Leib in Teutschland zu den sei
nen angelanget.



Gedruckt zu Paderborn bey Marx
theo Brückner /


Anno M. DC. I.




EPIGRAMMA IN PROFECTIONEM

Indicam Ioannis Soestman
niab Oesterrode.

Q Visquis es Eximios qui quæris ab arte Pelasga
Fructus. hunc vigili perlege mente librum
Tunc potes, vt quiuis tua verba tenacia veri
Esse putet potius quam procul ire velit.





Dem Ehrwür-

digen / Geistlich vnd Hochgelar-
ten Herrn Leonardo Rubeno der
heiligen Schrifft Licentiaten / vnd Abt
des Gottshauses Abdinghoff zu Paderborn /
meinem großgebierenden Herrn vnd
werthen Patronen.

MEin geringen / doch bereit-
willigen vnd trewen dienst-
nechst hertzlicher wünschüg
aller zeitlicher vnd ewiger
wolfahrt zuuor / Ehrwürdig An-
dechtig vnd Hochgelarter Herr / vnd
großgünstiger werther Patron / Ew
E. A. vnß. G. ist so wol auß wolgeüb-
ter vielfaltiger erfahrung / als auch
auß außbündiger wissenschaft hei-
liger Göttlicher Schrifft nicht vn-
bewußt / welcher massen Mensch-
A 2 lichem

lichem geschlecht / von Natur eingepflanzet / das es allzeit etwas zuthun vnd zu schaffen haben wil / welches sich ansehen leß / als habe es der ewige Gott / Schöpffer Himmels vnd der Erden deutlich vermeldet / in dem er verzeichnen lassen / daß auch unsere erste Eltern im Paradyß vor ihrem trawrigem fall / vnd also im stande der vnschuldt / zur arbeit angewiesen seind / dan Gott der Herr / nahm den Menschen / vnd setzet ihn in den Garten der Erden / daß er denselben bauete vnd bewahrete / spricht Moses Genes. 2. Welchem zu folge die heiligen vnd hocheleuchteten Erzvätter / vor vnd nach der Sündfluth / sich in ehrlicher arbeit zuergehen gefuhen gewesen seind / wie dan auch alle vernünfftige Heyden daher den Müßiggang verworffen / arbeit aber gerühmet / be-
vorab

vorab aber in ihren Schrifften/auß
der erfahrungge hinderlassen haben /
daß die Menschen dermassen zur ar-
beit geneiget/daß sie auch lernen bö-
ses thun wan sie nicht guts zu arbei-
ten vorhabē/ Daß ich iezo geschwei-
ge / wie solches auch an den jun-
gen Kindern/erschen werde/daß da-
hero Job recht schreibt / daß der
Mensch zur arbeit geboren werde
wie der Vogel zum fliehen/Job 7.

Solchs habe ich von meiner ju-
gendt auff/ bey mir selbst befunden/
vnd ohn ruhm zu meldē/ist mir stets
die arbeit anmütig gewesen / weil
aber einer zu diesem / ein ander zu
einem andern von Natur geneigt ist
nach dem der Geist Gottes seine
gaben seines Götlichen gefallens
auftheilet / so hat mir vor allem zu
reisen/ frömbde Landschafftē zube-
sehen / vnd vielerley zuerfahren / be-
liebet

Vorrede.

liebet in welchem / weil ich zu för-
 derst wargenommen / daß sothans
 mein vorhaben Gott dem Herrn
 nicht mißfellig were / als der ihm
 an Abraham, Isaac, Iacob, Ioseph,
 Mose, vnd andern heiligen Leuten/
 ein ebenmessigs / gefallē lassen / vnd
 die reisende Frömbdling oder Wan-
 dergleute / in seinen sonderlichen
 Vätterlichen schutz vnd vorsorge ge-
 nommen / Wie dauon mit höchstem
 lust zu lesen ist / Exod. 22. vnd 23. Leu.
 19. Deut. 10. Ezech. 47. zach. 7. vñ
 an mehr örtern / weil ich demnegst
 gesehen / daß alle ehrliebende vnd
 verstendige Leut / sölschs (wie der auß-
 hündige Philosophus vnd Poët Ho-
 merus an seinem Vlisse, Virgilius a-
 ber an seinem Aenea,) ruhmwürdig
 außgegeben / vnd mit lob gepreiset
 haben / Weil ich endlich auch meine
 geliebte Eiteren darzu nicht ohnge-
 neigt

neigt besunden / vnd von denselben
ein günstigen abscheidt erlanget /
hab ichs im Namen Gottes gewa-
get / vnd mich auff die fahrt gege-
ben / durch Göttliche schickung aber
vnd hilff / bin ich zu zweien vnter-
schiedlichen mahlen / mit grosser vnd
vielfaltiger gefahr / mit ohnaufs-
sprechlicher mühe vnd arbeit / auch
nicht mit geringen vnkosten / in die
ferne / grosse / herrliche vnd hochbe-
rühmbte Landschaft Indiam kom-
men / die ihrer grösse vnd vorbün-
digkeit halber / von vielen vor daß
drittheil gantz Erdkreises gerech-
net wirt / darin ich viel in vnseren
Landen seltsams dings / viel herrli-
cher Gewächs vnd Wundersamer
sitten des Volcks gesehen vnd ange-
mercket habe / welchs / da ichs al-
le erzehlen solte / were leichtlicher

Der anfang als das ende zu finden /
in fürze muß ich aber das sage / weñ
ich diß vnser Vatterlandt Teutscher
Nation ansehe / so ist's zwar so reich-
lich mit allerley Noturfft begnadet /
Daß wir Gott dem Herrn nimmermehr
gnugsam dafür dancken können / In-
dien aber hat derselbe getrewe Gott
auch nicht vergessen / sondern mit
Golt / Silber / Edelgestein / Gewür-
ze vnd köstlichem Gewechse / diesem
vnd vielen andern Landern weit vor-
gezogen / daruon aber zu handeln /
ist nicht dieses orths / doch wirt in
diesem meinē Büchlin / dessen etwas
angedeutet / welchs Büchlein ich an-
fangs allein mir zum besten / vnd
damit ich die sachen stets ihm frischē
gedechtnisse behalten möcht / schlecht
vnd einfeltig verzeichnet / diß mein
verzeichnisse aber mögen villeicht
etliche gutherzige Leute zusehen be-
kommen.

men haben / bey mir angehalten /
vnd ohn ableßig treiben / daß ichs
durch offenen druck / auch andern
mittheilē solte / dessen ich mich zwar
lang gewegert / Endlich aber ha-
be ich so viel destomehr ihrem suchen
stadt gegeben / weil sie mir zu ge-
müth geführt / vnd ich gestehen müs-
sen / daß also menniglich würde sehē /
daß ich diß mein schweres reisen /
nicht vorwitziger oder vnachtsamer
weise gethan / sondern daß ich ne-
ben vielen nützlichen vnd lieblichen
obleruationibus, auch Gottes seiner
Weisheit / Allmacht vnd güte / wahr
genommen / der so wol eine als die
andere Landschaft reichlich mit ga-
ben vberschüttet / vnd mit dem / daß
er einen orth nicht alles gegeben /
vns Menschen auß allen Nationen
vhrsache der liebe / freundschaft vnd
brüderlicher trewe / vorgestellt ha-

be / in dem wir sehen / daß ein Landt
des andern nicht entrahten oder ent-
berer könne.

Nach dem nun diß mein geringes
Wercklin / für die Leut gebracht vnd
an den tag gegeben werden solt / war
von nöten daß ich demselben einen
bequemen Patronen ersehe / der es
zum theil wider die Låstermeuler
schützen / vnd zum theil auch der ge-
ringen einfaltigen arbeit bey men-
niglichen ein ansehen manchen könn-
te / zu welchem mir ohn zweifel Gott
der Herr / Ew. G. A. vnd H. G. in
den sinn vnd ins Herz gegeben / auch
an deroselben gewiesen vnd gezeiget
hat / weil die / auch frömbde Nationē
vnd Lānder durch wandert vnd be-
sucht / daß sie dan vermöge irer auß-
bündigen vñ fürtrefflichen geschick-
ligkeit / mancherley erfahrung vnd
von

von Gott beschehret hohem Stande / vnd ansehen / solches am besten vermöchte / vermöge aber deroselben angeborenen Leutseligkeit / vnd gegen viele gespürterer güte / das selb zu leisten auch geneigt were / daß ich nun solche anleitung Gottes folge / vnd Ew. E. A. vnd H. G. diß mein Büchlein demütig vnd in unterthänigkeit dedicire vnd zuschreibe / solches bitte ich zum fleissigsten / wolte dieselbe zum besten vermercken / vnd diß mein geringes doch wolgemeintes Büchlein / wie auch mich selbst günstiglich in ihren schutz vnd beforderung auff vnd annehmen / daß wirt ihm Gott der Herr lassen gefallen / vnd ich bins viel mehr mit meinē demütigen Gebett als meinem armen vermögen / vmb Ew. E. A. vnd H. G.
jeder

10 Vorrede
jederzeit zuuerschulden mehr als
willig / vnd thu dieselben hiemit
Göttlichem schutz vnd segn be-
fehlen / im Jahr nach Christi Ge-
burt 1600.

Erw. E. A. vnd H. G.

allezeit dienstwilliger

Johannes Soestmannus
von Disterode.



Indianische Reise
IOHANNIS
Soestmanni Oesterrodens.

Nach Christi ge-
burt 1585. bin ich Johan Soest-
man von Oesterrode / durch ver-
sehung Gottes vnd verwilligung
meiner lieben Eltern auß mei-
nem Vaterlande nach Lübeck
gezogen / vnd daselbst mich ein
zeitslang vnterhalten / aber gleichwol mich zu sieben
vnterschiedlichen mahlen nach Portugal vnd wei-
ter in Hispaniam, mit einem Schiffman ge-
nant Peter Vogt / vor einen Büchschützen
begeben / Endlichen bin ich in Hispaniam demo-
rirt / vnd mit einer Armada in Indiam gesiegelt /
vnd in Anno 91. zu S. Lucas ankommen daselbst
mein abscheide genommen / vnd 15. Meyle weiter
nach Siuyl gezogen / daselbst mich / bey einen Ca-
pitain genant Martin Mund vndergestellt / vnd mit
einander einig worden vnd contrahiret auff einem
Schiff mit namen S. Schwan umb 100. Duce-
ten in Indiam zusiegeln / seyn wir durch hülff vnd
versehung Gottes auff Canardien lande / gele-
gen Sudwest 300. Meyle von Hispanien / an-
gelanger / alda Wasser genommen vnd fortan
gerückt / auff das Wilde land Dominico, gelegen
West

West Sudwest 200. Meyl von Canardie/welches
Land gar wildt ist/vnd böß von Volck vnd Mensch
fressern / doch auß versehenung des Allmügendes/
Mönche/Barfüßer Ordens/dahin gezogen/dero zu
versicht vnd hoffnung / ein solches/wütendes vnd
ohngezühtes Volck zum Christlichẽ Glauben vnd
erkenntniß Gottes anzuleiten/aber von solcher bösen
art / jemmerlich ermordet vnd auffgefressen wor-
den/ Nach diesen seind die Patres auß der Societet
Iesu dahin gezogen / auch in meinung durch hülf
Gottes sie zu bekehren / aber ebener gestalt ober-
nichten greuel an denselben attentiret vnd be-
gangen / vnd die jenigen so von den Gottsfürchti-
gen Lehreren vnd Beteren gefressen / alle plögli-
chen vnd des gehen tödes gestorben/warumb dann
fünff Personen die Marter kron erlangt.

Vnd auß solchem Mirackel. haben sie endlich
Gottes straff vnd vngnade vermercket / vnd her-
nach nicht allein begehret / sondern auch an die
Peroschen geschrieben/vnd vmb Lehrer Göttliches
Worts vnd seiner erkennisse angesucht / vnd
werden nunmehr begierich dasselbe von herken zu-
hören/auff vnd anzunehmen.

Wiewol nun gemeltes Landt böß von Volck/
ist es dennoch gleichwol von Gott mit sonderlicher
wunderbarlicher vnd guter fruchte/ dauon sich das-
selbige Volck herrlich/reichlich/ vnd statlich wol er-
nehren vnd behelffen kan / verschn vnd begnadet
worden / nemblich den Reiß vnd Weizen/ welche
von sich selbst erwachsen vnd saamen / zu dem
auch herrliche fruchte der Bäume / die sters durchs
ganze

ganze Jahr zeitige vnd reiffe Frucht bringen / als
da seyn Calumische Nüsse / welche bey ihnen werden
Cocos genandt.

Sicolapotos ist ein Apfel außwendig von far-
ben wie ein Danner Borcke / inwendig aber wie
rothe belebete Fleisch brühe / haben zween stein vor
ihre Kerne / gleich zweyen tauben Eyern / sein so
groß vnd lang als eine fante von einer Maß /
Auch wachsen bey ihnen viel Melonen / ihr gestalt
wie Kürben / auch viel Cedronen welche bekant
frucht ist / Es erwachsen auch bey ir en Eyfel Pel-
lepirrios genant. Dieser Apffel were zu wünschen
in Teutschlandt / denn mir vngleublich daß heylsa-
mer vor die francken Leute als dieser Apfel erwas
könnte befunden werden / welchs gestalt außwen-
dig wie ein Danapfel / vnd seine größe wie ein Kin-
destorff / inwendig als ein Rübe / sampt vielem süß-
en safft welcher kan außgepresset vnd getruncken
werden / dessen geruch so lieblich daß er die fran-
cken stercket vnd danon genesen.

Auch erwächset daselbst ein Frucht / mit namen
Plantenus, welche Frucht / des ganken Indiant-
schen lands tägliche Speise ist / der Baum grün
vnd zweyer Menner hoch / ist so weich wie ein
Rübe / daß er kan mit einem Fuß umgetretet wer-
den / die Bletter wie ein Man lang / vnd Ellen breit /
die Frucht ist außwendig grün / in gestalt einer Le-
berworst / vnd wachsen deren an die 300. aneinan-
der / eh er aber reiff ist / geschicht nicht am stamme /
sondern muß abaeschnitten vnd an einen warmen
Orth da viel feur ist / ein tag oder drey gelegt werdē /
alsdan

alsdan werde die Schalen schwarz / inwendig gelb
gleich wie Butter / von geschmack süß vnd lieblich /
dies essen sie an stat der zukost / che es aber reiffet /
wird es gebraten vnd für Brot gegessen.

Auch wechslet aldar ein Apfel genant V Veabus
der gut ist vor den Blutzanc / inwendig voll flei-
ner stein / außwendig aber den Teursche Äpfeln fast
gleich. Vnd endere viel herrlicher Früchte mehr /
deren nahmen vnmöglich alle zu erzehlen.

Nach diesem alle / halten sie auch einen schö-
nen Ehestand / wiewol sie wildt vnd vnuersten-
dig / vnd so etwan zwey Personen zusamen beache-
denselbe wird vom Vatter vnd Mutter geholffen /
geschicht auch von denselben die Copulatio / halten
vor ihren Gott / was sie des tags erst am Him-
mel sehen / wird von jnen auch dafür angeruffen /
erwehlen keinen andern / in meinung die Creatu-
ren nicht zu erzürnen / In dieses Gottes nah-
men sprechen die Elteren obgedachte Personen
zusammen / vnd welcher vnter den beyden das
Ehegebot vbertritt / wird zu todt geschlagen / auch
zieren sie den Ehestand mit reinigkeit des Flei-
sches / dero gestalt wan das Weiblein Schwanger
ist / wird es dem Manne von ihr kundi aethan /
alsbald zeumt der Mann sein Männlich glied /
vnd binders zu mit einem gemächlich darzu qua-
lificirten Faden / enthelst sich biß sein Frawe von
ihren Weiblichen banden erlöset ist / da er aber
sein Wasser machen wil / löset ers auff / vnd bin-
det es alsbald wider zu / hat also mit seinem Weibe
vor der Geburt nicht mehr zuschaffen / Hierbey
werden

werden sie dennoch sonderlich geehret Dis sey also vom Land Dominico geredt / seyn alda eine kurze zeit vber verharret / vnd auß furcht der Menschenfressern / damit keiner von den vnsern gefangen würde / widerumb abgewichen.

Folgens sein wir In S. Martin / ist ein ecke in Indierlandt gelegen / darinn wir drey Wochen lang mit allen vnseren Schiffen verharret / dar wolte einmahl von den vnseren ein junger Knabe sich verlustieren vnd baden / schwemmet also ein steinwurf abe vom Schiff. da wirt ihm von einem Fisch / genant Tibron, ein Wein am Leibe abgerissen / seyn wir mit vnseren Booten hin zu gefahren / gemelten Knaben zureuen vnd aufzuhelffen / aber zu spede ankommen / doch ihn ans Landt gebracht / vnd dem Fisch vorthan nachgesetzt / vnd mit dem Angelen gefangen / des Knabē Wein vnuerwesentlich auß dem Leibe geschnitten / vnd sampt dem Knaben zu grabe gebracht worden.

Also haben vnser Borgartē vnd Rauffschiffe / ihre Anckere auffgehoben vnd fortgefahren / vnser Galleen schiffe aber daselbst noch verharret / vnd baldt hernach mit Gott in Cartachena in Indien kommen / aldar etliche Hispannische Güter aufgeladen / vnd dero Stadt Perou vnd etlichen mehr vmbliegenden Stetten / vberlandt zugeschiekt / mit den vbrigen Gütern seyn wir gefahren nach Numero dedeos, alle vnser Güter aufgeladen vnd alda zwölf Wochen verharret / in dieser Prouinz ist die Hauptstadt Peron In welcher es in 400. Jahren nicht geregenet hat / wechset doch sehr schöne Frucht / dan der Thawe verfrischer das

B land

Landt alle Nacht, daß man kan einen Schuh vber/
nehen / auch ist hir böß reißend / denn die Erde ist
von einander gespalten / also daß man offtermals
muß vier oder fünff meil weges vmbreisen / von
wegen der riefse der Erden.

Numero dedeos ist auch ein böß Landt von
vergiftiger Luft / darin mag keine weisse Fräuwe
gebehren / oder sie bleibet todt beim kinde / so sie aber
gebehret wil / vnd die zeit ihrer Geburt vorhanden ist /
so muß sie in einander Landt ziehen / vnd alda ge-
behren / darnach mag sie wider herüber in ihr
Landt kehren / Die Erde in dem Landt ist so starck
vnd böse / daß ein Mensch so darein begraben ist /
in 24. stunden verweset / aber in acht vnd vierzig
stunden das Gebein / vnd alles mit einander verwe-
set vnd zu Aschen wirt / habe solches mit meinen
augen selbst gesehen vnd erfahren / darzu es dann
auch immer mit Donner / Blitzen vnd schweren
vngewitteren anhelst.

Ihr Brodt daß sie essen ist holz / helset bey in-
nen Cassabel, daß Holz oder die Wurzel darauß
das Brodt aemacht / wirt / ist sehr böß / vnd wann
sie ein Mensch essen würde / müste er alßbalde
sterben / weil sie noch ihren safft bey sich hat / so sie
aber gedürret vnd der safft herauß gedrucket / wirt
es ant zu essen / vnd machet starcke Leure / sie essen
auch viel frucht der Bäume / mehr denn Brodt /
deren ich nicht alle erzehlen kan.

Zu Numero dedeos wolten wir einmahl
spazieren gehen / vnd war vnser 15. darunter 4.
Trumpters / so liat ein hoher Berg ein Meil weges
von ermelten ort / darauff ein Dorff / in welchen

nur ettel schwarze Leute wohnen / da wir nun bey
das Dorff kamen / singen vnser Trumplers an
zu blasen / da sie das höreten / lieffen sie alle darvon /
auch wüßten wir selber nicht / ob wir verrathen
oder verkauffet (wie man spricht) solten werden /
erwischeten wir eine Frouwe / vnd sie gefragt /
warumb die Leute alle weg lieffen / hat sie geant-
wortet / man solte ihr durch Gott gnedig seyn / als
haben wir ihr Wein gegeben / vnd gebetten vmb
Wasser zu trincken / wiewol sie kein Wasser ha-
ben / müssen es von Regen samlen / doch war
ihr der Wein so angenehm / das sie vns ein wenig
gleichwol mittheilte / wie sie nun solche vnser
freundschaft spürete / machte sie an ihre Hauf-
thür ein stück von einem altem Lumpen / gleich
einem Zehnlein / als das nun die Feidsflüchtigen in-
nen waren / kehreten sie wider ein / vnd verkrochen
sich hinter ihre Heuser / als wän sie vns fürchteten /
vnd wir vor ihnen / wüßten also auff beyder seits
nicht / obs glaub oder vnglaub war / inmittels
gingen vnse Trumplers in die Kirche / vnd bliesen
vor dem Altar / da sie das sahen / würdten sie fro /
vnd kemen alda zu vns auff die knie fallen / vnd
beteten / man solte in auch gnedig seyn / denn sie
meineren man würde mit in selbā verfahrē / do gebē
wir ihnen vnser Gläschen mit Wein / so wir mit
genommen hatten / vnd trincken das ihr etliche
Voll waren / nach diesem / nämen sie Reiß /
welcher bey ihnen gerne wächst / theten denselben
mit einem Beutel in den Hassen / biß er gar war /
schütterten sie denen in ein hölzen Becken gleich
einem kleinen Schweyn tröge / streueten darüber

viel Pfeffer vnd kein Salt / achteren deßselbe vor
eine herrliche Herrn kost / Da wir nun miteinander
woll gessen vnd truncken hatten / theten vns woll
80. Personen solcher Leute / mit grossen freunden
vnd singen / nicht anders als wan man mit der
Procelsion vmbgehet / widerumb mehr denn
vber den halben wegt / an vnser Schiff geleiten.

Auch hat es hir viel weisser Vögel / vnd auch
viel grüner Vögel / als ein Papagoie, Wasse-
moyen / Cathalinen / Perkitus / auch fliegt aldar
ein Vogel ist so groß als ein Ximne / hat ein klein
Schnebelein / vnd lange Füße / vnd seine farbe ist
als ein gelautertes Gold / Von dieses Vogel Fe-
dern / machen die Wilden Leute ihre Hüter / die
sie auff den Haupteren tragen / auch machen sie
von dieses Vogels Federn / also schöne Con-
trafey von allerley Historien / dero gestaltd / das
es kein Mahler in Teutschland / fleissiger machen
könte / Also haben die van Panemol / vnd die von
Lime ihre Hispanische Güter auch empfangen /
In mittels seyn vnser Schiffe wider erbauwet /
vnd Königliche Majest. selber alda empfangen /
auch seindt miter weilen der 12. Wochen aber 500.
Marinero orths Bohtsleute gestorben / das sich
vnsr General befürchtete / wie er doch könte die
Schiffe wider in Hispanniam bringen / von we-
gen gerinaitkeit des Volcks / hat derowegen sie-
ben Schiffe / von den Eltesten / verbrennen las-
sen / vnter welchen meines Capiteins Martin
Mundi Schiff auch war / vnd bin gesetzt worden
von vnseren General auff eine Königliche Vor-
gatten / die Magdalena genant / vnd alda vnser
sechs

sechs Vorgarten/ mit Silber geladē/ vnd von dannen widerumb nach Cartachena gefahren/ aldar haben wir Königlichē Majestēt Gold entpfangē.

Cartachena vnd Numero Dedeos, seyn die Stette in Indien welche die Hispannier terram firmam nennen/ in diesen zweyen Stedē kommen die Hispannischen Schiff an/ also ist auch Cartachena ein vnaesunder orth/ von Luft vnd speise/ Gold vnd Silber haben sie genug/ ist daselbst kein gemünztes Gelt/ sonderen bezahlet einer den anderen mit vngemünztem Silber vnd Golde/ entfangens bey dem gewichte/ auch wächst hir viel seltsam garyl, gleich denn Weinrancken/ daselbst hat es auch ein sehr schönē Haffen/ darein wol tausendt Schiff vor aller gefahr ligen können/ Dis Cartachena hat Ioannis Draco auß Engelandt 17. wochen eingehabt/ aber hungers halben müssen verlassen/ Hir ist es auch voller Schlangen vnd Egedeyen/ daß kein Mensch barfüßig gehen kan/ er tritt inen auff den Leib/ ja sie kriechen auch auff der Taffel/ Man isset/ gleich den Fliegen/ auch zu nacht wenn man schlefft/ lauffen sie einem vber das Angesichte/ Die schlaff bette aber werden auffgehengt/ vnd von einem Netze gewircket/ dis Bette wirt bey inen ein Amake genant/ kan auch kein Mensch auff der Erden schlaffen/ er wirt Todt krank/ müssen also in solchen Betten die Nacht zu bringen/ vnd können sich hin vnd wider/ wegen der hitze wiegen vnd schwencken.

Wisset auch das vnser Caphoier Schiff sein in S. Martin geblieben/ als wir nun vnser Schiff

ganz zu geladē. sein vnser Caphoier Schiff wider
 umb zu vns gekömen / vnd gesiegelt nach Howanz /
 Nordwest / von Cartachena 300. Weil daselbst ge-
 blieben / vnd vnser Schiffe wider erbawet / vnd die
 Floth auß Noua Hispania erwartet / nach dem sie
 lange auß geblieben / als haben wir vnser zeit nach
 Königlich M. ordnung verseumet / nemlich
 den Octob. haben derowegen müssen waren /
 vnd vnser Binder läger alda gehalten / wiewol es
 deß orts nicht Winter ist / wirt es dennoch also ge-
 nennet / vnd haben vnseren Schatz in die Festung /
 deren alda drey von K. M. gebawet / vmb aller
 gefahr willen / müssen hinein bringen.

Vnd liegen deren Festung zwō an der See / ge-
 gen einander vber / wardurch alle Schiff iren lauff
 haben müssen / die dritte ligt aber auß dem Marck.

Als wir nun vom Septemb. an bis auß dem
 Majum verharreten / seyn wir alle samptlich be-
 dacht nach Hispaniam zu fahren / seyn wir ge-
 kommen vnter die VVarmoden / vnd lutiā die
 VVarmoden Passuer. bey welchem man aroß ge-
 fahr austehen muß / das Wasser hat daselbst seyn
 nen lauff auß dem Osten / vnd der windt stimmet
 mit ihm vberlein / durch das ganze Jahr / also daß
 kein Schiff herauß kan kommen es geschehe dann
 in dem Octob. Auch hat K. M. daselbst offter-
 mals Schiff vnd Armada verlohren / vnd des
 orts da man nach Indien hinein siegelt / kan
 man nicht wider herauß kommen / vnd darumb
 weil der Windt stets auß den Osten / Nordost / vnd
 Norden kompt / vnd weil das Hispanische Coes
 Nord-

Nordost seyn muß / mußten wir des Windes haben vier oder 500. Meil umblauffen / vnd so hoch ins Norden / das wir aldar Westenwind bekommen / vnd mit diesen Westenwind Sudost seyn gangen / mit diesen Sudost gang haben wir die Hispanische Coste widerumb auff vnd an gesiegelt / vnd seyn gekommen auff S. Hubes buck / in Portugal darnach in Lisebon gesiegelt / aldar vnser R. M. Silber außgeladen / vnd in die Galleen gebracht / welche es nach Ciuilien geführet / in das Haus der Conterration. Vnd wir sein also ballaster / mit ihñe dahin gefahren / vnser General war Don. Francisco de Calomo Hidalgo de Castili.

Hauwan da wir Winter läger gehalten / was mit am selben orth begegnet / muß ich kurz vermelden.

Hawan / ist ein Insel 300. Meil ihr lengede / vnd 80. ihr breite / vnd auch 300. von Indien abgelegen / ihr Speise sein Wilde Schwein / der das ganze Landt vol ist / vnd auch viel Wilde Pferde / sie essen auch räaliches Schilt Pedden / ihre größe fünffzehhalff Schutlang / auch ist das Landt voller Krebse / die lauffen in dem Holke machent löcher in die Erden / vnd kommen nimmer ins Wasser / wolte ich eins mals aldar in den Walde gehen vnd Frankosen holz haben / vnd nam einen Mohren mit mir / der des Waldes gelegenheit wuste / wurden also zusamen einig vmb etliche Real vnd gingen mit einander vber die Compese nach einer Stangie / darinne ein Gärtner / mit namen Schvvan Petro ein Mohr / vnd in dieser Stangie wahr vnser abscheidt / das Nachtle-

ger zuhalten / hatten auch nichts zu essen mit vns
 genommen / denn hie halber / kan man nicht viel
 mit sich tragen / weil es aber ein wildt Landt / vnd
 nicht viel reysens darinn beschicht / vnd dunckele
 Wege hat / verjrreten wir vns / vnd gingen biß in
 die Nacht / also daß wir gang müde waren / kamen
 wir entlich auff viel tausent Beume / die alters hal-
 ber ein vber den andern gefallen waren / dar wir
 denn vber vnd vnder steigen mußten / vnd nach
 langweiligem wandern / haben wir vns zur ruhe
 geben / aber wegen Mucken vnd Fliegen / Schlan-
 gen / Attern / Wollen / Eggederen vnd Karpattes /
 dessen das Gehölze voll / vnd des Nachts herfür
 kriechen / wir nicht schlaffen können / sondern dessen
 Ungeziffers vns mit sehr erwehren müssen / in-
 sonderheit seyn die Karpattes an vns hengen blie-
 ben / waruon wir halb frantz vnd in ohnmacht ge-
 fallen seyn / Dieser Barm Karpattes ist fast den
 Spinnen gleich / aber längere Füße / blaues Leibs /
 kriechen dem Menschen in die haut / vnd saugen das
 Blut heraus / so sie erfertiget / fallen sie von sich
 selbst ab / vnd kriechen gleich den Leusen in die Kley-
 der / vnd wann man sie auß der Haut wil kriegen /
 bleibt der Kopff in des Menschen Leib stecken / vnd
 muß heraus schweren.

Es hat auch aldar viel Palmen beume / die werf-
 fen alle Jahr die obersten Schälten oder Boreken
 ab / wonnt die wilden Leute die Heuser decken / des-
 sen gedachten wir auch / vnd machten vns ein Hü-
 te dauon / der Mohr nam sein Art / vnd hawete ei-
 nen Kchagen vnd Keberhortschen Baum / spaltete
 die bey-

die beyden voneinander / vnd rieb ohn Eysen vnd
 Stahl darauff sewr / daß wir Holz kondten damit
 anzünden/ Nach dem nun solches alles beschehen/
 thete vns auch hunaern / denn der Canardi Wein
 wil etwas zuuerzehren haben / fragete ich meinen
 Mitgesellen/ Neger lo tenge mutsche kabeo, il-
 lius my respunto, Io habe bonn remedi. Da
 nam er die Axt in die Hand / vnd hawete einen
 Palmbaum herunter / welcher inwendig gleich ei-
 ner Ruben/ vnd im Stain voll Maden/ welche ein
 Glied von ein Finger lang seyn / vnd eins Rebe-
 halms dick / deren als mein Mitgeselle ein ganze
 Handvoll/ ich schmecket auch zu / do ich sie aber zer-
 beiß/ kam gelbe materij darauff / daß sie mir weger-
 ten/ vnd nicht essen kondte/ als das der Mohr sahe/
 greiff er einen breiten Stein/ legte den auffß sewr/
 vnd briecht darauff die Maden / do schmeckeden sie
 süß vnd aut als Grieben / vnd thete ihr wol bey die
 zwen hundert essen / Nach diesem hieb der Mohr
 das oberste von dem Palmbaum herunter / da die
 Zwenae anfanaen/ einer Ellen lang / da kan man
 den Baum essen / vnd schmecket als Nüßkern/
 Nachdem wir nun wol gessen vnd getruncken her-
 ten/ schlieff mein Gesell eyn / Ich aber kondte we-
 gen des Ungeziffers nicht schlaffen / denn ihr Ge-
 schrey klanæ die aange Nacht/ als wann man auff
 einem Messings Becken spielete/ Ober das hörete
 ich ein Gesange / wuste aber nichts darauff zu ma-
 chen/ dieser lautet also: Den Lingen den vvuhy,
 den blancken den vvuhy, den Preten den vvuhy,
 den veerden den vvubyhy. Da erwachete
 ich

ich meinen Gefellen / vnd gingen dem Gesange
 neher / vnd wol ein schußweges von vnser Hütten/
 stünden wir einen alten Moren sitzen / bey einem
 Feurer / der war nach seinen reden / hundert vnd
 mehr Jahr alt / saß vnd Trancet Tav vacke .
 das ist Kraut / das dörrē sie auff / vnd weñ es dörr ist
 grusen sie es auß vndreibens klein / darnach wickelē
 sie es in ein blat / zündens an / vnd saugen diesen
 Rauch in sich / welcher sie stets gesunt behelt / solchs
 thun auch alle Indianer / Nach di sem hawereten
 wir Frankosen Holz / vnd trugen es an die Kanier /
 vnd führte es des andern tags mit vnserem Bohe
 ren nach dem Schiffe.

Zu wissen das wir vns auch haben geschlagen
 mit Ioannis Draco Engelendischen Meerreuber /
 welcher mit 14. Schiffen bey der Insel / Dipinius
 vns an getroffen / daselbst haben wir anderthal
 ben tag zu samen scharmüßelt / seyn vnser Hi
 spanischen Schiff 26. gewesen / vnd die Engel
 schen in die Flucht geschlagen / vnd ihrer Schiffe
 zwey abgenommen / eins mit namen Michael,
 das ander war ein Jagtschiff der Königinnen auß
 Engelandt / darinnen wir eine Kiste mit Perlen
 bekommen / welchen wir sampt den zweyen Schif
 fen Königl. M. auß Hispanien / zugeschießt / aber
 in diesem Scharmüßel vns bey 300. Man abge
 schossen worden / So viel sey gemelt von mei
 ner ersten Reyse die ich durch Göttliche
 hülffe vollendet.

Die ander Indianische
Reyse

Wilt ich dem Le-
ser auch zu gemüch geführt habē
die ich gethan hab in die Newe Welt
welche Genandt wirdt/ Noua
Hispania.

A Nnno 1593. Habe ich con-
cordirt vnd eingt worden mit Loweiss
Kels, Bürger zu Triann, der Stade
Siuilien, Captein vber das Schiff
Cure Delmahr genandt/ für 160. Ducaten/ mei-
nes officij ein Constabel, so seyn wir außgefahren
mit 36. Köntas vnd Kauffarts Schiff von Kön.
Mayest. in Hispaniam / auß dem Hauß der Con-
tertation in Ciuilis, auß welchem Hauß die In-
dianische Schiff / nach Indien in die neue
Welt abgefertiget werden/ seyn erstlich kommen
nach Canardia, daselbst haben wir etliche Schiff
verlohren / in einem großem Sturm vnd Unge-
witter / seyn also in demselben Sturm voneinander
kommen / daß nur drey Schiff bey vns geblieben/
Auch

Auch ist da ein Vorgatten / das ist ein Silber Schiff des Königs / war zimlich gerüstet mit Geschütz vnd Kriegsvolck von 308. Personen / darzu 20. stücke Geschütz / sein also vor vns hergefahren / vnd ihre Trummeters haben ihnen geblasen / vnd des Königs Genlein lassen fliegen / vnd errieben grossen hoffart / in dem tempt ein Blixem vom Himmel / vnd zündet das Schiff an / vnd verbrennet sie allzumal / biß daß es vor vnseren augen gar zu bodem ging / vnd niemandt kondte ihn helfen / letztlich seyn wir weiter forthgefarē / in das Wilde Landt / Auvvalopo, 800. Meil von Canardien 4. Meil von S. Dominico Da sein wir West Sudwest gangen / als wir nun zu Auvvalopo kommen / sein wir bald von Durst gestorben / den die lufft ist wegen grosser hize so vergiftet / vnd weil wir so geringe von Schiffen waren / dorfften wir vns auffß Landt nicht begeben Wasser zu schepffen / von wegen der Menschen fressern / haben dero halben den gansen tag mit vnsern Schiffen lauiert / biß wir endlich / ein gelegenheit des orts erfahren / dar kein Wald / vnd Wilde Leute weren / haben also vnser Cillupen das ist ein Schiffs Vorthe aufgesetzt / damit ans Landt gefahren / doch dorfften wir inen nicht trawen / haben dero halben all vnser Geschütz nach dem Landt gestellt vnd geschossen / das desto sicher die vnserē befriediget wehren / das Wasser aber auß der Erden müssen graben / vnd wiewol es sehr Wüst von Roth / dennoch etliche Fesser gefüllet / vnd an bordt gebracht / sein die vnseren so heuffig
zuge-

zugefahren / des Wassers also begierich vnd geizig
 gesoffen / das drey Personen / welchs jämmerlich
 an zusehen war / alsbald starben / vnd were diß
 wol jedem geizigen Seuffer in Deutschlandt auch zu
 wünschen / Darnach vnser Anker auffgehoben
 vnd vorthgefahren / ist vns ein so grosse menge Vö-
 gel / der grossen Bildnisse halber nach geeilet / vnd
 sich in vnser Schiff / ja auff vnser Achsel vnd Hüte
 gesetzet / zu dem auch fliegende Fische / welche off-
 termahls bey tag vnd nacht zu vns ins Schiff
 geflogen / flogen wie die Schwalben auff dem
 Wasser / deren wir offtermals gefangen vnd
 gegessen.

Also sein wir kommen in die Golpso von
 Mesliko, in noua Hispania in ein Hafen S.
 Svandeloe, darcin vnser Hispanische Güter auß-
 geladen / vnd die von Mesliko vnd andere umb-
 ligende Städte / ire Hispanische Güter entpfan-
 gen / daselbst haben wir ein halb Jahr gelegen vnd
 Schiffe wider erbauret / vnd inmittels die
 Mecklicaische Güter widerumb in vnser Schiffe
 eingenommen / als nemblich Heute von Ochsen vnd
 Kühen / deren viel hundert tausent / nur umb der
 Haut willen getödtet wurden / vnd in Hispanien
 geführt / das Fleisch aber verzehren die Vögel
 vnd Vngezieffer.

Hir ladet man auch Gräne / das ist Leibfarbe /
 der ein Zentner alhir gilt 300. Ducaten / Hir ladet
 man auch Eugenille / das ist blawe Farbe / ist etwas
 bessers kauffs / auch gibt das Landt viel Nycoda-
 mes ist ein wolriechende Materi vnd fleußt auß dem
 Beumen /

Weinen / auch gibt das Land viel Balsam Del /
 Weyrauch / vnd Almastiae / diese Güter kaufft
 man den Wilden Leute ab / vnd gibt ihn Kakav von
 dauor / das ist der Wilden ihr Geld / ist ein Frucht
 gleich den Lorberen damit treiben sie ihre kauffmā-
 schafft. Auch hat es hier viel seltsame Thier / erst ich
 Calcunische Hünner so viel gleich wie die Schwal-
 ben in Teutschlandt / auch hat es hier viele Schwe-
 ine / die haben einen Sattel auff dem Rücken / als
 ein Camel / haben bunte flecken als Edelen / ha-
 ben kein Haar / aber ein lang weiß Maul gleich dem
 Wandwörffen / vnd vier kurze füsse / vnd seyn
 gut zu essen / Auch hat es hier viel Schlangen /
 ihre leng habe ich feltst mit meinē füßen gemessen /
 vnd sein 22. fuß lang / einen Kopf / vnd lange Zehen
 gleich einem Hunde in Teutschlandt.

Auch hat es Hunde gleich den teutschen Hun-
 den / aber glatt vnd kein haar / seyn braun als
 ein Ahl.

Auch hat es hier viel Tigers / Das Tiger-
 thier ist böß / vnd wüthet als ein Wolff / ist auch in
 derselbe höhe / seine sterck wie ein Löwe / seine Natur
 kümpt mit einer Katzen überein / auch solche Klä-
 twe / welche es kan ein vn auß lassen / eines Fingers
 lant / ist bundt als ein luchs kan einen Menschen
 mit einem griffe / durch die kleider in den Leib
 greiffen / vnd die Därme herauß langoen / erwür-
 get den Menschen / Ochsen oder Pferde / es gildt
 ihm alles gleich.

Hier hat es auch viel Hünner / alsich den Teut-
 schen Hünnern / aber haben drey Köpff / vnd der
 mittel-

mittelfte Kopff hat einem Rañ gleich einẽ Hanen/
vnd legen in der Erden ihre Eyer / seyn bunde
als Vogels Eyer / vnd ihre Federn seyn schwarz /
vnd ihr Natur ist böß / vnd niemandt kan ihr ge-
nießen / Auch wechslet hier ein Kraut mit namen
Semper viue / das kräut nützet das ganze Indiani-
sche Volck / zu ihrem getränk / zu spinnen / zu
nadenadeln / Fisch damit zu fahen / die gestalbe
des Krauts ist vnd hat lange spitzie Bletter / weñ sie
volkommen gewachsen sein / seyn die Bletter eins
Manßlang / vnd zweyer handt breit / vnd dreyer
finger dick / vnd der bletter stehet auff einem stam-
me / wol bey die zwey hundert / der safft ist süß vnd
lieblich / vnd die säßen die nach bleiben seyn gleich
der Seiden / wirt auff Hispanische sprach Pyt
genant / vnd thewr nach Hispanien verkaufft / ha-
ben auch die Bletter oben am ende / harte spizen /
dar machen sie Ratteln auß.

Auch ist es ein groß fruchtbar Landt / vnd
speiset alle andere Indianische Lender mit Brebt /
Hovvannen, Florido, Portorico, Dicumpeze,
Santiago de kuge, Riodeplate, Kartachena, Nu-
mero De Deos, vnd andere orter mehr / die ich
nicht alle erzehlen kan / Zu dem kan ich auch niche
bergen / das ich in diesem Landt krank worden / vnd
den Blurgang bekommen / in einer Stadt mit
namẽ Lauerra Crux vnd mich von dannen führen
lassen / von wegen der greissen hitze vnd verair-
gen lufft / nach Sant Svandeloe, an dem Meer
gelegen / daselbst hat der Windt / zwischen Mi-
chaeli vnd Ofteren / allzeit auß Norden ge-
wehet / vnd ist dieser Windt etwas gesunder
vnd

vnd frtlicher den der Landtwindt / Auch ligt ein
 klein Ehlant ein viertel Meil von S. Svandeloe
 dabey ein groſß Caſtell gebawet / daſelbſt hat R.
 M. ein Kranckenhauß / darein die Spannigſa-
 rer auß Hiſpania ein ziehen/vnd ire Doctoren vnd
 Apotecſ haben / damit den Krancken geholffen
 wirt / vnd werden wol vber 50. oder 60. Meile
 dahin geſüret / vnd wan ſolchs nicht were/würden
 den Krancken/ſo keine wartung hetten/von Mücken
 vnd Fliegen die Augen vnd Ohren außgefref-
 ſen / wie ſolches offtermals beſchehen / den einem
 gefunden Menſchen kaum möglich das er ſich
 der menge dieſes Vngeziſers in denen Landen
 erwehren köndte / daſelbſt auß gemelten Kran-
 ckenhauß / bin ich curiret, zu halber franckheit
 aber ſein vnſere Schiffe von dannen gefahren /
 vnd vnſere Doctoren mit ihnen / bin alſo verlaſſen
 worden von allen meinen Bekandten vnd
 Freunden / in meiner ſchweren Kranckheit / den-
 noch hat Gott der Almechtig / mich nicht verlaſſen
 / ſonderen hat die Neue Chriſten ermanet /
 die bey 20. vnd 30. ſein zu mir kommē/durch ſonder-
 liche ſchickung Gottes meiner gar treulich pflege-
 ren / vnd wenn ich ihr eigen Kindt were gewſen /
 hetten ſie meiner nicht beſſer können warten / der
 liebe Gott wölle es ihnen vielfaltig vergelten.

Auch hat es dar viele/ auß Hiſpaniſch genant
 Kuhmanne auß lateiniſch Crocodilus. dieſer ſein
 viel in Noua Hiſpania, vnd thut gemeltes Thier
 trefflichen groſſen ſchaden / es erhelte ſich aber im
 Waſſer / vnd ſuchet ſeyn Nahrung auffdem Lande/
 er wüß

Erwürger Menschen/ Pferde/ vnd Ochsen / sein
 Länge/ wenn es vollkommen gewachsen / ist 18.
 Schuh lang / sein gestalt ist als ein Egedey / hat
 vier kurze füsse/ einen langen Schwanz / die hant
 man nicht wunden kan mit Eysen oder Stal /
 außgenommen am Bauch/ hat auch in der Vor-
 brust viel Diefem / laufft wol ein Meil oder zwo
 auff's Landt nach seiner nahrung aus dem Wasser-

Nach dem ich nun mein vorige gesundheit
 mit Gottes hülff bekommen / habe ich mich beae-
 ben in einen kleinen Roibe/ das ist ein Postschiff/
 nach Howan / darin vnser Schiffe wider ange-
 troffen / vnd bin also bald / von vnserem General
 Don Berndin auff einen Gallion gesetzt / welche
 der Dolphin genant.

Auch hat mir vnser General gemandirt/
 gute tractation vnd pflegung der gesundheit / bey
 meinem Capitein / mit namen Palaske, also seyn
 wir fortgefahen / vnd lustig mit Gottes hülff in
 Kalis, in Hispanien gelegen / ankommē/ das
 ist nun mein ander Reise / die ich mit
 Gott vollender habe.



S

Von




Von meiner Widerkunfft in Teutschlande.

Erstlich von Siuilen in Hispaniam
bin ich außgezogen / auff S. Lucas/
aldar bin ich eins gewordē / mit einem
Frantzösischē Schiffer / genāt Petro Clerico
wonende in Siuiliē, nach Sant malla in Franck
reich zufahren / vnd seyn gekommen an ein
Insel Bolin genandt / gelegen 14. Meilen
von Nantis in Borthanien / vnter dieser
Inseln ist vnser Schiff vnd Gut genommē /
Nach dem habe ich mich begeben nach Nan-
tis, habe alda gefunden einen Hollendischen
Schiffer / bin mit ihm gefahren in Seelande
in Middelhorch / von dar bin ich gefahren
nach Hollandt / in Ambsterdam / von dar
bin ich gereiset nach Glylande / dar habe ich
ein Schiff bekommen vnd nach Ham-
borch gefahren / hir mit vns
Gott befohlen.

* *

Endschluß



Beschluß Rede

an den günstigen Leser.

Dieweil der freundliche Leser / meine geringe doch schwerliche vnd gefährliche Keyse verstanden / vnd Probierung deren Heydnischen Länderen / Darinn mich Gott der Allmägende so gnediglich / dafür / dieweil ich abtem schepffe / wil dancken / erhalten vnd bewaret hat / So verursacht mich der augenschein in diesem geringen Teutschlande / die vielheit der mannigfaltigen Neuren Lehrer / Ketzer / Kotten / vnd falschen Propheten / welche vor wenig Jahren auffgestanden / vnd sich an tag geben / wor durch denn viel armer Seelen verführet / vnd gantzlichen zum abgrunde der Hellen werden eingetrieben.

Von welchen denn der Herr gesagt / Es werden falsche Propheten auffstehen / vnd in Schaffs kleideren zu euch kommen / vnd bey ihrē Früchten solt ihr sie erkennen / Nicht desto weniger hat Gott der Allmechtig seine Barmhertzigkeit nicht können unterlassen

Zeschluß Redes

lassen/ vnd schickt seine Diener an die Städte
pforten/ auch Wege vnd Zeune/ vnd nötiger
die Lamen vnd Blinden herein / daß er wil
sein Haus voll haben/ Dis gibt der Augens-
chein in Indien / darin / so viel hundert
tausent Menschen / bekehret / vnd getaufft
worden/ welchen das Heilige Euangelium
wirt vorgetragen / warlich diese Heydni-
sche Lender mügen wol anstatt der Städte-
pforten vnd Zeune gerechnet werden / vnd
wir/ die wir Christen willen genennet seyn
geladene Geste/ haben ein Weib genommen
Ochsen vnd Acker gekauft/ vnd dergleichen
entschuldigung / vnd verschmeihen also daß
herrliche Abent Essen/ darumb wirt Gott
der Herr verursacht/ auch gewislich erfol-
gen / die geladen Gäste werden mein Abent-
Essen nicht schmecken.

Auß dem Wort/ bey ihren Früchten solt
ihr sie erkennen / Man ich zwar die Frucht
der Totten Lehr ansehe / vnd lege sie auff
eine Wichtschale/ so befürchte ich mich/ sie
solt nicht ein quintlein schwer wegen /
dis aber achte ich vor eine gute Frucht /
der das Wort Gottes nach dem befehl Chri-
sti fortpflanzet / wie / Gott sey lob / in
Indien / daher so viel Königreich / ja so viel
hundert tausent / zum Christlichen Glauben
gebracht worden/ worunter ich anders
halb

Beschluß Rede.

halb Jahr gelebet / vnd den eyffer der newen
Christen angesehen / wornon ich nicht ge-
nugsam erzehlen kan / dan dis teglich Ihre
Rede ist. Gloria in Excelsis Deo, gepreiset sey
der Herr welcher vns erleuchtet hat / diß
schreieich vor eine gute Frucht / daran
Gott der Herr ein wolgefals
len hat.

Ende.






Gedruckt zu


Paderborn bey Mattheo
Brückner /


Anno M. DC. I.











J601
S716i

